



ル 5
3150
12



門 5
號 3150
卷 12

黔南識略卷十七

貴州巡撫長白愛必達撰

石阡府

石阡府在省城東北五百六十里禹貢荊州荒裔秦
為黔中郡漢為武陵牂柯二郡地晉分牂柯置夜郎
為夜郎郡地隋為明陽郡地唐為思夷二州地五代
時入于蠻宋大觀三年內附置承州後廢元置石阡
等處長官司屬思州安撫司明洪武五年改隸思州
宣慰司永樂十一年置石阡府

國朝因之設知府一教授一訓導一經歷一其境東至

銅仁府界八十里南至鎮遠府界十五里西至遵義
府界三百六十里北至思南府界五十里東南至思
州府界六十里西南至平越屬餘慶縣界六十里東
北至思南屬印江縣界一百七十里西北至平越屬
湄潭縣界二百四十里廣四百四十里袤六十五里
由府治七千三百八十里達于

京師領龍泉一縣萬山包裹獨處諸郡之中不與他
省接壤舊志所謂地非四達鮮有貿遷者也城爲明
嘉靖十年建周三里八分長六百六丈高一丈八尺
門四石阡之名因于阡山其山發脈于平越蜿蜒數

百里至郡城東北爲九龍山又迤東爲五老峰府治
之屏嶂也亦名府志山省志譌爲知府山其右爲侯
山鎮東山在城東里許龍山在城東南一里霧聚則
雨散則晴文筆山在城西三里掛榜山在城西南五
里以迤邐前列平如張榜也一名平崖松明山在城
南一里溫泉出其下又名溫塘山十萬山在城南六
里昔楊再興屯兵之所其上平行又名十萬壘崖門
山在城西南五里兩山如門駱駝山在城西三里又
西爲飛馬山排衙山在城西五里雲堂山在城西五
里林谷幽翳昔爲苗賊負嵎之所亦名雲臺山馬鞍

山在城西南十里山勢昂聳中凹如馬鞍香鑪山在城北十里平地突起四面陡絕可容數百人金雞山在城東十五里高百仞琵琶山在城西南十五里傳月夜常有琵琶聲蓋風泉相觸琤琮成響也一名天馬山萬壽山在城西二十里山下有洞傳有神羊出入人逐之卽化爲石土人呼萬壽聖隘門山在城南九十五里獅子山在城南北百里有二山高聳飛鳳朝陽山亦在其處黃楊山在城西南七十里青山在城北七十里筆架山在城西一百里三峰排峙因形以名迎仙峰在城西北五十里下有龍塘泉大夫峰

在城西南八十五里三尖峰在城西南九十里朝天嶺在城南三十里一名紗帽山長沙嶺在城西南六十里望鄉崖在城西一百六十里下有泉亦曰望鄉泉今名望江崖鬼崖在城西南八十五里又城南五里有臥鬼崖寒林箐在城西十里竹樹陰森烟雲密翳相連者爲杉木箐又有坪耕箐在城西南一百二十里與隣近之方竹崖葛蔓箐山丹坪棉花坪走馬坪均所屬險隘處也太虛洞在城南五里舊名燕子崖明萬歷中郡守江大鯤易今名洞口最高寬丈餘進數折卽暗然炬而入中有萬佛崖上鐫仙家白日

四字明郡守曾之可題曰黔南第一境秋滿洞在城南十五里峻崖隔岸洞門軒爽後通也塘砦平茫溪諸處明正統間苗賊爲亂居民竄洞內賊守洞門以困之民從洞後逸皆得免風神洞在城東北十里不可深入入則大風飄發龍洞在城北二十五里中產奇石有文可觀草塘後洞苗所出沒處也上有六么娘子廟龍底■在城西南三里其上源爲包溪逕城東黃茅圍合大溪繞郡前至思南界注烏江烏江自甕安餘慶之崖門渡趨而東入郡境經葛閃渡有餘慶之白泥司佛山河水北流來注之又東經郡之桶

口渡有餘慶之滿溪及郡之龍底河凱科江洋溪深溪樂回溪東北流來注之又東爲三江口入思南大溪卽今白崖江稍東爲凱科江上有凱科關今譌爲斜逕城南與龍底河合樂回溪在舊葛彰司南過方竹箐注深溪深溪在城西北二十里洋溪在城北十里來自銅仁之提溪司皆入于龍底江者也郡有十二關東爲松明關凱科關南爲松坎關東南爲大定關官道所經也北爲武定關又東北爲石灰窰關界黃平州爲鎮甯關界思南之蠻夷司爲銅鼓關界印江縣爲鎮夷關界施秉縣爲象鼻關茶園關界餘慶

縣爲錫樂坪關橋曰迎恩郡守羅文思所修也先是府郭外河上街多水患文思于橋畔築石堤河流遠折不復如前泛溢矣文星橋在北關外永濟橋在城南六十里啟靈橋在城西北舊名河下橋萬歷中郡守袁亮改今名渡有五曰龍底渡曰白崖渡曰洋溪渡曰桶口渡曰葛閃渡府舊稅所也今移本莊桶口二處地近四川氣候較正田畝雖瘠薄通水利故無虞昔郡守羅文思堰說云平田作渠引水以資灌溉非不善而天時稍旱水易竭與無渠等惟有堰始能常蓄澗流作堰之法略如作壩但壩須畱港此則橫

截中流較平田稍低數寸水大則直過其上水小則停蓄不洩也塘說云兩山夾道其中稍平開土成坵如堦而下者爲塋田不耐旱救之惟以塘作塘之法先度地勢于田頭之上當眾流所歸處隨地寬廣開挖爲塘塘形多上高下低其下卽以塘土築橫堤堤脚仍布木橋以防崩卸中畱水竇以備啟放此謂頭塘至田之中段亦有旁山歸溜處照前作爲腰塘次第啟放間有開塘得泉因泉開塘者大都藉山澤雨溜以爲蓄塘中儲水草菱荷魚蝦之類則水活亦可得利塘法云築塘者堤脚布木橋弗若堤上植柳枝

葉可蔭塘水盤根可固堤脚溜水竇用新伐松樹存皮剖爲兩空其中如竹之去內節然長短視堤脚上下覆合壓堤下頭入塘內尾出堤外鑿頭上半空處方寸作水眼以木條削尖豎塞水眼啟放時抽豎木條水從眼流出欲止則塞之松樹存皮在水中經久不朽也壩法云水分則勢緩聚則勢急安車之處必急水方能衝轉非築壩不可其法用勁木長六尺爲椿將一頭削尖交叉打入水中如鹿角于近岸安車用砂石壅堆之使無動搖其布椿上廣下狹偏水急流至車所車自轉動若河平水緩則離下壩十餘丈

以上更築一壩仍于壩頭接作曲壩直連下壩則眾水由一港奔流逼成急勢可安水車二座其法最爲明備共計成熟田二萬七千二百一十三畝額徵秋糧一百九十石有奇改徵米七百四十五石有奇徵正銀一千九百三十六兩有奇常平倉貯穀五千三百三十五石有奇米五千六百九十一石有奇道光七年于城西南二門內建立義倉二所共捐輸穀一千六百七十二石有奇兵糧廩糈由縣倉支給學額十七名鎮東書院在鎮東山麓義學一場市四苗有崗人猱兜木老楊保諸種言語衣服與漢民同土司

一元時楊九龍以功授石阡副長官司今承襲通計漢莊一百三十有奇苗寨十四設二汛三十六塘城中駐劄石阡營都司一員千總一員把總二員額外委一員兵二百十名分防龍泉縣把總一員偏刀水汛外委一員每塘撥兵二名近因小雞公地方卽古雞翁縣舊址爲鎮遠銅仁思南思州交錯之所每歲由藩司詳委佐雜一員專駐其地稽查稱周密焉

論曰石阡當播夷未平之先迫于強寇四郊多壘偏沅倚爲扞蔽故置府焉及誅應龍遵義平越以次割隸黔疆四封周密僻不當衝又黔郡之至簡者也所屬尚人獐兜狝狝獠楊保諸種類視他苗尤爲馴柔雖其地苦瘠鮮葢藏然自郡守羅文思教民築堰塘興水利至今峰坳厓隙之間層級樹藝泉源四出脈注而綺交之有歉歲無殍民也士大夫銜命出身不必擇地皆可爲但求其實有裨于民者而設施焉卽當時或未盡知後未有不歌其利賴者前有召父後有杜母豈嘗別有赫赫名哉

龍泉縣

龍泉縣在府治西二百四十里省城東北七百三十

里漢爲武陵牂柯二郡地隋爲明陽郡地唐爲夷州地宋爲珍州地元於龍泉坪設思州安撫司明洪武七年置龍泉長官司改屬思州宣慰司永樂十二年改屬石阡府萬歷二十九年改爲龍泉縣

國朝因之設知縣一教諭一訓導一典史一其境東至思南府安化縣屬黃泥堡界三十里西至平越直隸州湄潭縣屬黃沙界三十里南至平越直隸州餘慶縣屬松烟鋪界七十里北至思南府婺川縣屬茅籠界五十里東南至本府黃心樹界五十里西南至遵義府遵義縣屬黃家壩界一百一十里東北至思南

府印江縣屬朱家場界五十里西北至遵義府正安州屬河包場界一百里廣袤約三百餘里城爲明萬歷三十二年建周一里三分計三百六十一丈高一丈八尺登以石門四鳳凰山在城內爲縣之鎮山下有龍泉自洞中流出灌溉一邑縣之得名以此又有卓筆峰東山在城東二十里石牛山在城東五十里中華山在城東九十里上多古梅將軍山在城東南五十里宋紹興間任正隆之變都督安文誓師于此因名義陽山在城東二十里唐義州故址綏陽山在城西北三十里唐綏陽縣故址雞公山在城北二十

里唐雞翁縣故址山筆巖在城東五里上有山筆巖三字傳係唐人書夜郎巖在城西十里上刻夜郎右甸四字傳唐李白曾經此洗甲巖在城北三里明將劉縱平播凱旋勒天河洗甲四字于巖石龍穿徑在城北二十里危巖雙岬中通一線騰雲洞在城南二十里又名太極洞左右有五石石頂有文類太極圖野人洞在城南兌溪洞在城南九十里內坦外險土人常避兵其中洞水可資灌田黃陽壘在城東三十里巔岘絕壁河流遶之宋時屯兵營壘猶存又東有青竹崖瑪瑙崖黃蠟箐北有隘頭箐義陽江在城東

北五十里發源于穿簾谷三跳石諸處環抱縣治通烏江泥水河發源東山通義陽江桶口河在城東一百三十里入烏江石貫塘河在城北二里上流由老木橋三跳石二水會成大河下流過青溪合桶口河犴木溪在城南入清江溪清江溪在城北五里合桶口河魚子孔泉在城東常有小魚自石竇中出故名暖塘在城北門外泉水常溢鄧坎寨在城南明時楊應龍襲將軍于鄧坎官軍擊走之破其金竹青岡嘴處跳山等七寨蓋縣去播最近也田畝則長磧一帶皆山石确犖之地長水巔一帶高下適均頗稱膏腴

現在成熟田二萬四千七百九畝有奇額徵正米二百零三石正銀一千八百五兩有奇常平倉貯穀一萬三千石有奇社倉穀二百二十六石有奇學額八名城中建有達泉書院場市十九木饒桐茶兼產土布通屬均係漢莊無苗寨土司城北有九杼關與婺川縣分界最爲扼要設二十五塘大道十五僻路十城中駐劄石阡營分防把總一員兵名又偏刀水場分防外委一員兵十八名無驛遞設鋪司六由桶口渡歷黃心樹爲赴川通衢出湄潭而通開州爲赴省捷徑惟界連石思等府六州縣近城數里之地卽隸他縣而遠隔他縣數百里之外轉屬龍泉鞭長莫及風氣各殊邑之所由難整齊者此也

黔南識略卷十七終

黔南識略卷十八

貴州巡撫長白愛必達撰

思州府

思州府在省城東北五百四十里禹貢荊州之裔周屬楚巫黔中地秦屬黔中郡漢屬武陵郡唐設思州隸黔中採訪使宋隸夔州路元置思州軍民安撫司自龍泉移治清江卽此地也十七年敕徙安撫司還舊治明洪武三年分置思州宣慰司永樂十一年鎮遠侯顧成平思州十二年分其地爲八府四州廢宣慰司改爲府隸貴州布政司隆慶二年遷思州府治

于平溪衛萬歷五年還舊治

國朝因之雍正五年割湖廣平溪清浪二衛來屬改爲
玉屏青谿二縣隸府轄于貴東道設知府一教授一
訓導一經歷一其境東至湖南沅州府界一百六十
里西至鎮遠府界一百里南至黎平府界一百一十
里北至銅仁府界一百二十里東南至沅州府界一
百里西南至鎮遠府鎮遠縣界二十里東北至銅仁
府界一百一十里西北至銅仁府銅仁縣界一百二
十里廣一百九十里袤二百六十里至
京師七千三百八十里東南四十里爲玉屏縣西南

三十里爲青谿縣陸路東至銅仁西至青谿南至八
弓北至石阡俱係僻路扼沅靖之噤喉爲涪渝之唇
齒控臨蠻徼雄勝要區城爲明永樂十三年創築土
城隆慶三年知府張子中議遷于平溪衛城萬歷五
年復還舊城砌以石周圍三百三十丈高一丈五尺
三十年築後山石城一百二十丈初郡治後有山曰
松園壘在城外明知府蔡懋昭以山俯瞰城中敵至
難守以環山爲城建據勝臺于其上名曰據勝山城
東十五里爲崖前山又東六十里爲龍塘山又東百
里爲旗頭山又東黃道司地有黃崖冲山旗頭黃崖

昔人防守處也南一里爲點燈山又三里爲峩山飛
山又九十里爲聖德山城之西爲盤山二十里爲岑
鞏山田宣慰牧馬場也又三十里爲住溪山爲龍坑
山爲橋山又八十里爲鼇山又九十里爲瑰樓山又
百里爲天應山土人嘗禱雨于此呼雷而雷應思州
江水發源處也北二十里爲六農山五十里爲金豹
山又北都素司地有土麻山又東北一里獨有峭山
三十里有江頭山亦名彈琴山又平牙寨地有獅口
山施溪司地有漾頭山銅苗出入所也十萬壘在城
西五十里其地平廣昔田宣慰屯兵于此又黃道司

北有田埂坪四山圍繞中有平田方輿紀要云坪前
半里爲小石橋路出晃州通沅州大道又前四里餘
爲大石橋皆往來通津也嘉靖中議者謂田埂坪一
帶與平溪萬山黃道諸衛司及沅州相鄰接爲三省
屯砦通衢又迫近大隴山叛苗宜築一城增兵戍守
云岑賈坡在城南百里外接洪江苗常出沒爲患九
曲坡在黃道司白溪崖則與銅仁分界處也境內之
水入烏江者爲異溪在府城東五十里源出鎮遠府
西北界大白山路瀨河東流數十里合南北二水經
鐵廠南山之南又東北曲折百里至府屬西北境又

鐵廠東北水東南流來會之又有竹坪苗龍等河來會之入於白崖河經石阡之北注烏江入鎮陽江者一爲馬口溪在都素司卽灑溪之上源也下流至城南爲灑溪又會注溪繞城而東合架溪出兩河口入鎮陽江注溪在府城西南三十里明史地理志施溪長官司東有施溪是也一爲黃道溪源出府北境山東流九十里折東南五十里至黃道司西南折東流逕銅鼓塘至大魚塘北合鎮陽江鎮陽卽澧江卽古之無水也隨地而異其名在思州府屬曰澧陽江在青谿曰青谿在玉屏曰平江亦曰平溪又統名之曰

洪江明史地理志黔陽縣北有沅水又東有洪江是也而舊志統名爲鎮陽江至湖南黔陽縣始入沅入沅則由洞庭湖入江矣入沅者一爲龍溪在城西下流合凹溪入沅一爲左溪在都素司南下流入沅一爲治水溪在左溪西南亦入沅都哨關在城東一里清平關在城南五里盤山關在城西二里明嘉靖十三年知府李允簡爲麻陽亂苗所執救兵不至乘馬出是關至稍寨崖高水深是其授命處也黃土關在城南十五里先是府舊設平溪清浪二衛後劃歸湖廣康熙中知府陸世楷持議謂思州雖列爲府所屬

黑南諸州卷十六
四
止四土司居民附郭不滿百家丁糧不及一小縣而
又商旅不通營伍不設供億難與他府齊宜仿黔西
平遠近制降爲州隸之鎮遠而以施溪一土司割附
銅仁可救一方之困不果行雍正五年始以楚衛改
二屬縣地居三楚上游寒暑較正田土頗瘠現在成
熟田三萬九千八百三十一畝有奇徵米一千八百
一十九石有奇徵銀三千三十三兩有奇除留支公
項外餘銀起解藩庫又解耗米變價銀二百二十六
兩有奇府倉實貯穀二萬四千四百石有奇社穀十
二石府倉貯三石餘分貯四土司掌管歲支兵米廩

米外奉文採買湊供輓運銅仁轉運松桃石峴備支
米一千三百九十一石八斗產米僅敷民食偶歉收
卽藉楚米接濟牙帖銀四兩隨地丁批解戶口編查
保甲共計一萬四千五百九十戶約七萬九千餘名
口學額十六名書院現在新修場市十四樹則楓香
麻栗桐茶爲多近亦漸植橡樹杉木及棉花轄土司
七都坪峩異溪長官司附郭元置臺蓬若洞淫溪等
處長官司明洪武六年改置授土酋何夢霖二十五
年省入黃道溪司永樂十一年復置授土酋周斌與
何氏並世其職都素長官司在府西九十里明洪武

黔南諸郡卷十八
五
十九年何文學以討苗功授長官司又元時周世憲授領兵頭目明永樂四年授長官司黃道溪長官司在府東北一百三十里元屬思州宣慰司明洪武五年土酋黃文聰以功授正長官司劉貴副之以上土司每司一印二家輪掌施溪長官司在城北二百五十里元置施溪漾頭等處長官司明洪武五年遷置于平地寨授劉貴子道忠隸湖廣沅州衛永樂十二年來屬今承襲有印府南有洞人約五六百戶其俗採毛爲絮以禦寒飲食避鹽醬夫婦出入必耦語言服食略與漢同城中駐劄鎮遠鎮分撥千總一員外委

一員汎兵九十九名水陸設十四塘每塘撥兵二名餘畱城守嘉慶十九年建便民倉三間于郡署貯有捐輸穀千石豐年則備糶買補餘息增置歉歲則糶借兼行以資接濟餘與各郡同

論曰思州緊隣楚沅切近銅仁二處有事郡當其衝無事則僻簡之區不見爲繁也平溪清浪二衛改縣來屬郡之藩籬固矣惟玉屏幅員太狹民之廬舍籍于縣其田地仍籍于楚想撥隸時經理者或未詳察也玉屏多巨室習詩書以糧田隸楚之故赴試太遠歲以爲苦康熙中巡撫田雯疏稱平溪清浪二衛學

歷係黔屬思南府提調應試貴陽不過五百餘里前
因用兵之際將驛站改隸楚南而學校隨之諸生應
試東下武昌迢遞川塗不下二千五六百里資斧旣
艱而鼓柁洞庭駭浪驚濤士心恆多畏阻臣赴任時
身過其地同時呼籲云兩科以來從無一士能赴武
昌應試者情殊可憫應請復還黔屬就近提調之制
以示作養嗣以一衛改縣來隸雖均設有學校而凡
糧田隸于晃州者仍須隨糧赴楚考試以故冒考之
案多近經兩省會議奏定章程此風始得稍息此又
在于當事者酌權宜而量爲其變通也

玉屏縣

玉屏縣在府治東南四十里省城東五百五十里漢
爲武陵郡地唐爲沅州地元置平溪等處蠻夷軍民
長官司屬思州軍民安撫司明洪武二十三年置平
溪衛屬湖廣都司萬曆二十九年改屬貴州三十一
年還屬湖廣

國朝裁都司隸辰州府雍正五年改衛設玉屏縣隸貴
州思州府設知縣一教諭一訓導一典史一其境東
至湖南晃州廳界五里西至青谿縣界三十里南至
晃州廳界八里北至本府界二十里東南至晃州廳

界三里西南至冕州廳界五里東北至府屬黃道司界八十里西北至府屬都坪司界二十里廣袤約六十里舊轄平沅麻三屯雍正六年劃麻沅兩屯歸湖南芷江縣僅將平屯三里中之兩甲撥歸玉屏共三十餘戶幅員最狹雖所屬有波州新莊龍溪口曹家溪田埂坪等處皆離城七八十里且插入本府及冕州芷江地界畸零相錯難以疆域道里計也縣爲入黔門戶扼楚咽喉形勢據其衝要城本衛治明洪武二十五年建周九里三分高二丈五尺甃以石門四玉屏山在縣治後屹立如屏縣所由名也廻龍山在

城中縣治依山立焉印山在學宮前紫氣山在城西隅坡陀回互岡巒起伏雜花古樹最爲奧曠東山在城東門外松柏夾道修篁交蔭清籟鳴條山壑答響山之右有寺樓可眺遠俯瞰大江回滌如帶天馬山在城東一里橫亘江左爲縣城鎖鑰下有萬卷書崖疊石千層如插架牙籤寶書森列也三台山在城東三里山頂三峰特起道定山在城南三里與雙薦峰並峙象鼻山在城西二里與獅子山對峙野雞河之左右爲黔楚要隘飛鳳山在城西五里中峰高聳旁有兩山夾拱如翼七星峰在城南里許石蓮峰在城

黑南諸山卷一
北二里舊傳張三丰修煉處龍塘坡在城東三里一名月屏山圍崖在城北三十里一名鐵柱山形勢高峻上可望見銅仁梵淨諸山蠟崖在城北六十里通銅仁施溪六洞水銀等山諸苗路最爲險要昔常集兵防守壩坪在城南六十里南通革溪天塘西通新溪湍洞等處明立堡防守兔兒坪在城中有明尙書鄭逢元書院皂笏坪在城西五里康熙十九年定遠大將軍章泰統滿漢官兵自湖廣克辰龍關屯營此地柴沖洞在城東五里有神號柴沖大王祈雨輒驗鮎魚洞在大江右石壁百丈中凹一洞碧水珠迸產

鮎魚焉或曰洞石垂爲鮎形故名又城東二十里有鯪魚洞產鯪魚美味平江在城北上流爲鎮陽江卽澗水也至府境滙灑溪諸水下入沅江中有顯靈灘水勢最爲險要舊有平溪鯉魚二關城東有文水河易家河俱入澗水城西二里有野雞河滙西溪梭溪諸水經野雞坪入澗水太平河在城西二十五里由龍塘流下入于澗水龍塘在城西二十里太平堡下爲功水湍洞鬼盧諸苗出沒要路明時苗寇蒙倫薄城由此因設界牌哨防禦卓嶺在城北十里昔曾設兵今裁城西二十里爲秋溪哨東二十里爲南林堡

東三十里爲鯉魚堡西三十里爲羊坪自昔皆防禦要處故今俱設塘汎焉三閭大夫廟在北門外水月菴水府廟在城東縣治倚山負江縮穀之地明隆慶中遷府治于此萬歷五年仍還舊治嘉慶壬戌三月陰霖日久澗江暴漲水不入閘者尺許知縣張澍曾建捍水議云江流自清浪入熊溪城西有獅子峰雄踞江口水無所泄其怒北有鎮平玉屏兩山作障則水不得不折而東而城當其衝下流則書崖蓮峰隔江夾峙碕岸旣狹疏瀉未易勢亦逾奮倘山潦橫溢則水必不能奪山以行廻而與城爲難矣擬自北門

至館驛取江中巨石砌之爲塘高一丈仍于土石堆積之處掘之以壯江身俾廓而有容用工不過百人爲期不過一月則居民可免淪胥之患陽侯難恣汎濫之威矣田多磽瘠現在成熟田八千三百五十二畝有奇徵銀二百九十四兩有奇改徵米三百一十九石有奇耗米變價銀五十九兩有奇牙帖銀三兩有奇常平倉貯穀一萬八千四百九十三石有奇社倉穀三百七十四石有奇捐輸穀一百四十四石道光七年新建義倉一所貯穀三百餘石廩米及秋冬二季兵精俱于秋糧內支給其春夏二季不敷之數

由府倉撥發學額八名新建屏山書院在印山上漢
莊二十三無苗寨場市三植宜桐茶白蠟桃李梨栗
桑杉之屬濱江多魚鼈鰕魚最佳城中駐劄鎮遠鎮
分撥守備一員把總一員外委一員原駐汛兵一百
五十名嘉慶七年裁二十名撥歸松桃協防守石峴
實駐汛兵一百一十名驛曰平溪上至清浪驛六
十里下至湖南晃州驛八十里額馬五十匹站夫一
百名馬夫二十五名朱家場為楚粵人民入川孔道
銅仁思南石阡皆以此為門戶別有捷徑二一通印
水八弓一通涼織入天柱餘俱與各縣同

青谿縣

青谿縣在府治西南三十里省城東五百又五里元
為大坪村苗地明洪武二十三年置清浪衛于清浪
關隸湖廣都司萬歷二十九年改屬貴州三十一年
還屬湖廣

國朝裁都司改隸辰州府雍正五年改衛設青谿縣隸
思州府設知縣一教諭一訓導一典史一其境東至
府屬羊坪界二十五里西至鎮遠府鎮遠縣界五十
里南至鎮遠府界五十里北至本府界二十里東南
至湖南沅州芷江縣界五十里西南至鎮遠府界二

黑商諸田卷十一
十里東北至本府界二十里西北至印江縣界二百
四十五里廣袤二百二十里舊爲衛治明永樂二年
建城周六里二分計一千一百二十一丈三尺有奇
高一丈登以石門四乾隆六年重修瑞雲山在城內
山多雲氣上建瑞雲宮北障山在縣治後城圍其半
爲邑屏障雍正十三年五月新疆苗變水陸梗塞楚
兵駐沅州不得進賊逼青谿知縣鍾兆熊率同官兵
並民人等齊上城內北拒守兵民皆奮木石俱下
賊乃退卽此山也東山在城東三里有寺竺雲山
在城東北三里竹屏山在城南三里靈寶山在城西

一百里寶爐山在城北一百五十里觀音山在城東
北一百一十里玉屏山在城西北二百里臥雲山在
城西北二百四十里青溪在城西卽鎮陽江之下流
經玉屏山入沅者也鐵廠河竹坪河苗龍河俱在城
南流台府屬之異溪注烏江者也雞鳴關在城西八
里山崖峻峭下瞰清江稱隘要爲入省孔道田畝惟
漏溪一屯兩山夾峙地苦磽瘠其餘各屯尚多膏腴
現在成熟田八千三百八十二畝有奇改徵米三百
三十石有奇支放兵糧廩米不敷之數由府倉撥補
徵銀二百八十三兩有奇牙帖銀四兩並批解藩庫

常平倉貯穀一萬九千七百九十三石有奇豐年產米足敷民食學額八名建有瑞雲書院場市四通屬六屯每屯村莊十數無苗寨亦無土司樹宜杉桐茶果椿楓松柏之類並產棉花無銅鉛礦廠亦無稅課設九塘大道七僻路二城中駐劄鎮遠鎮分撥把總一員外委一員兵八十九名驛曰清浪上至鎮遠一百里下至玉屏六十里額設驛馬五十四站夫二百名東門渡口一係驛站大道餘與各縣同

黔南識略卷十八終

